



2024-imut aningaasanut inatsisissatut siunnersuut.

(Aningaasaqarnermut Naligiissitaanermullu Naalakkersuisoq)

(Siullermeerneqarnera)

Demokraatit pingaarnertut iluarisimaarpaat, Aningaasanut inatsisissatut siunnersuummi sinneqartuulaarnissaq takuneqarsinnaammat. Pingaaruteqarpoq, ingerlaavartumik ukiumoortumik aningaasatigut inatsisiliatta sinneqartooruteqartarnissaat, taannatuaammat, aningaasaqarnikkut imminut napatinnissatsinnut ingerlavissarput.

Ajoraluartumilli aningaasaqarnermut inatsisip aamma takutippaa, aningaasaqarnerput suli avataanit tapiissutinik annertuumik naatsorsuuteqarnermik pisariaqartitsisoq. Uanilu pingaartumik eqqarsaatigaara naalagaaffimmiit tapiissutit. Uanilu ajoraluartumik ilimanaateqarpasinngilaq, Naalakkersuisut appartitsinissamik takorluugaqartut. Nalunngilara, Naalakkersuisut partiillu Naalakkersuisunut tunuliaqutaasut allatut oqassammata – paasiinnarparali, tigussaasunik suliniuteqartoqaranilu tigussaasunik iliuuseqartoqanngitsoq, naalagaaffiup tapiissutaannit isumalluuteqarnerup annikillisarneqarnissaanik takutitsisunik.

Pilersaarummik ersarissumik maqaasisaqarpunga, qanoq qanorlu sukkatigisumik, pisortat allaffissornerannut aningaasartuutit qaffakkaluttuinnartut appartissinnaanerigut. Pilersaarut ersarissoq amigaatigaara, qanoq ililluta innuttaasut pisortanut akiitsui appartissinnaanerigut akiitsoqaleraluttuinnarnissaallu qanoq pinaveersaartissinnaaneripput. Pilersaarummik maqaasisaqarpunga, qanoq ililluta namminersortut ingerlataani sulisitsineq annertusarsinnaaneripput. Pilersaarummik maqaasisaqarpunga, qanoq ililluta ersarissumik inuiaqatigiit isertitaat qaffatsissinnaanerigut soorlu assersuutigalugu takornariaqarneq imaluunniit aatsitassat iliuuseqarfiginerisigut. Allaanginnami oqaatsit kusanartorsuit timitaqanngitsut atorineqartut.

Taakku saniatigut inuiaqatigiinni sammisat arlaqartut, sivisuallaamik iliuuseqarfigisimanngisatsinnik. Aaqqiinarsarisoqalaartoqaraluarpoq, ajoraluartumilli imaappasilluni, mattusiiginnarnerit atorniarneqarlutik sivisuumik atuuttussanik allannguutaasussanillu aalajangiinissamut annilaangasoqarmat. Oqartoqarpoq, aaqqiussuseqqiissoqassasoq, piffissanngormalli, anguniagaqartoqaranilu piumassuseqartoqarani, naggataatigullu mattusiiginnarnerit malittuunnaat ingerlallugit.

Taakkununga assersuusiularlaga:

Siullermik sivisuumik tusaasimavarput, Naalakkersuisut uani katersuunnermi sivisuumik utaqqisaasoq aalisarnermut inatsisissatut siunnersuut nutaaq saqqummiunniaraat. Neriorsuut taanna qangali qatangiinnartinneqareerpoq. Siusinnerpaamik upernaamut siunnersuut saqqummiunneqassaaq, aatsaallu takugukku uanga upperilissavara.



Aappassaattut Peqqissutsimut ataatsimiititaliarsuaq uani upernaami isumaliutissiissut sukumiisoq saqqummiuppaa. Taassumalu kingunerisussaagaluarppaa, Naalakkersuisut tungaanniit maannangaaq siunnersuutitik suliniutissanillu piareersimatitsilereerpeq, Peqqinnissaqarfik pisariaqartilluinnakkaminik taperneqarniassamat. Taamaattoqanngilarli. Akerlerluinnaanimmi pisoqarpoq. Naalakkersuisut piffissaq atorpaat uagutsinnut Inatsisartuniittunut seminarertitsinermut, tassani Naalakkersuisut piareersarsimangii villutik takkullutik. Siunnersuutissaqaratik. Isumassarsiassanik peqaratik. Ilisimangivillugu, qanoq iliorniarnertut. Tamanna pitsaanngilluinnarpoq.

Pingajuattut Naalakkersuisut ineqarnermut tunngasunut isumaqatigiisummik sanarusussimapput. Uanilu Naalakkersuisoq nersualarusuppara piareersarluarsimasarmat, isumaqatiginninniarnernut qaaqquusaangami. Kisiannili uani aamma imaappasippoq, isummernissaq ersigineqarpassilluni, siunniussaqaarnissamat ersilluni isumassarsiassaqaaranilu, susoqarnissaanik. Oqaatigilluaannarlugu, Naalakkersuisuniit allamik tusagaqarsimangilagut isumaqarmata, akiligassaq Danmarkip akilissagaa illut aserfallatsaaliornarisa kinguaattoorujussuarnerat, taamatuttaarlu ikioqatigiilluni illuliorsinnaanermut 95/5 aaqqiisummik taaneqartartumik siunnersuummik qaqtisiniartoqartoq. Aaqqissuusseqqinnerunngilaq. Aaqqissuusseqqinnertut tamanna taaneqarsinnaanngilluinnarpoq. Siunnersuutiminguna nalinginnaasumik qaqtisineq. Tamanna naammanngilluinnarpoq. Siunissamat takorluuinngippallaarneruvoq.

Sisamassaattut tusarparput, ilinniartitaaneq pillugu aaqqissuusseqqiineq ilinniartitaanermut iliusissatut nutaatut ittoq saqqummiunneqalersoq. Uagut Demokraatiniit tassunga atasumik AGGERSARNEQANNGILAGUT aammalu ISUMAQATIGINNINIARFIGINEQARATA. Naluara sooq, kisianni soorlu, Naalakkersuisut tassunga ingerlatamut pilersaaruteqanngitsut. Tassami illuatungiliuttunut saqqummiusserusunngimmata. Unali iluatsillugu apequtigilaaarlara, tassani suliniummi sumut killittoqarsimansoq?

Tallimassaattut ima isikkoqarpoq, akileraartarnermut aaqqissuusseqqiinermut isumaqatiginninniarnertit naggaseriartuaarneqalersut. Ajoraluartumilli imaappasilluni, aaqqissuusseqqiinerunani, nalinginnaasumik allannguinerinnaasoq. Uggornalaarpoq. Ilimanaateqanngilluinnarporlu, aaqqissuusseqqiinermik taasap nunatsinni inuuneq najugaqarnerlu akikinnerulersissagaat.

Nangillugu; tusarneqaaq, oqartussaaffiit pingaaruteqartut taakku tamaasa aaqqissuuteqqinniarneqarnerat, piffissanngormalli, Naalakkersuisut takorluugaqaratillu sapiissuseqanngillat. Aaqqissuusseqqiinernillu taakkartukkat taakku aaqqissuusseqqiinerunerussanatik, suliaqartoqassappammi.

Ajoraluartumilli aaqqissuusseqqiisoqannginnerata kingunerai, annertuumik suliasat ingerlanneqaarnissaannut aningaasanik amigaateqalernerq, innuttaasut atugarissaarnerunissaannik pigissaarnerulernissaannillu qulakkeerinnittussanik.

Taamaakkaluartorli aningaasanut inatsisissatut siunnersuummi suliniutissanik peqarpoq, Demokraatini iluarisimaakkatsinnik. Nuannaarutigaarput, soraarnerussutisiallit pilersoaqatigiinnissamat pisussaaffik kiisami peerneqarmat. Nuannaarutigaarput, naartulerusullutik peqqinnissaqarfimmi ikiorneqarusuttut pillugit Anna Wangenheim-ip siunnersuutaata pitsaasup piviusunngortinneqaarnissaanut aningaasanik



immikkoortitsoqassamat. Nuannaarutigaarputtaaq, Issittumi uumassusilerinermut ilinniarnepup bacheloritut ingerlanneqarnissaanut aningaasanik immikkoortitsisoqarmat.

Allarpassuaqarporli pingaartitassaraluatsinnik.

Siullermik Peqqinnissaqarfimmi assannik kissalaartunik amigaateqarpugut. Maannakkorpiaq aammalu siunissami ajornartorsiutaasumik. Taamaattumik naammanngilaq, sulisussarsiornermut ukiumut 2 millionit koruuniinnaat immikkoortinneqarsimaneri. Soraattaaliuinissamat aningaasanik immikkoortitsisoqartariaqaraluarpoq. Ajoraluartumik takujuarparput, kalaallit peqqissaasut suliffeqarfinnut allanut nutserneri imaluunniit nunatsinniit nutsertut. Sulisut taakku iluatinnaatilerujussuit tigungmiinnarnissaannut pitsaanagerusariaqarpugut.

Aappassaattut sinaakkutunik pilersitsissaagut, pinaveersaartitsisinnaasunik, inuit Peqqinnissaqarfimmut saaffiginninnissaannut. Sapinngisarput tamaat suliniutigissavarput, inuit pujortarunnaarnissaat. Sapinngisarput tamaat, imigassamik aalakoornartulimmik atuineq appartinniarsarissavarput. Sapinngisarput tamaat, inuit kalaaliminertornerulernissaat anguniassavarput soorlu aalisakkanik, qalerualinnik tuttunillu. Tamatta naatitartornerulissaagut, orsutornerput sukkutornerpullu millisillugit. Qulakkiissavarpullu, inuit timigissarnerulernissaminnut isumataarnissaat. Uani parteeqatima Nivi Olsenip arpaffissianik timersorfissanillu pilersitsinissamik siunnersuutaa assersuutaavoq pitsaasoq tapersersortarialillu.

Pingajussaattut misissortariaqarparput, qanoq ililluta meeqqat atuarfianni fagitigut atugarissaarnikkullu qaffassaasinnaanerput. Uani Demokraatit kissaatigaat, aningaasanik immikkoortitsisoqassasoq atuarnut ilinniartitsisunullu sinaakkutit pitsanngorsarneqarnissaanut imaasillugu illut pequtillu aaqqissuullugit imaluunniit aserfallatsaaliorlugit aammalu ilinniartitsinermut atortunik nutaanik pitsanngorsaalluniluunniit, ilinniartitsineq nuannarineqarnerulersillugu. Taakku saniatigut meeqqat atugarissaarnerat ukkatarineqarnerusariaqarpoq. Meeqqat arlaatigut pissuteqartumik ajornartorsiuteqartut ilinnialernissaminnullu piumassuseqanngitsut.

Sisamassaattut pisariaqarluinnarpoq, aallarnisaasunut pitsaanagerusunik atugaqartitsinissarput – inunnt pitsaasunik isumassarsialinnut. Imaappasikkami, allaffissuarmi aalajangerneqarsimasoq, nammineerluni suliffeqarfimmik aallartitsiniarneq ingerlatsinerlu sapinngisamik ajornartorujussuussasoq. Illumoorsinnaangilluinnarpoq, pisortat immikkoortortaqaarfiisa piaaralutik namminersortut siuarsarniarsarisut akerlilersussappatigut eqartunik malittarisassaqaarnikkut inatsisillu atuuttut ingasattajaartumik paasiuminaatsinnerisigut. Pilerinarsaasariaqarpugut suliffeqarfimmik aallartitsinissamat ingerlatsinissamullu.

Taamatut oqaaseqarlunga tamaanga naangallarpara. Demokraatini qilanaaraarput isumaqatiginninniarnernut akuunissarput neriuppugullu, aningaasanut inatsisissaq amerlanerussuteqarluartunit taperserneqarumaartoq.

Aningaasanut inatsisissatut siunnersuut Aningaasaqarnermut- aamma Akileraartarnermut ataatsimiititaliami suliareqqitassatut innersuussutigarpugut.